

大江考

楊慎

江出岷山其源實自蜀西戎萬山來至嘉州而沫水自雋州合  
 大渡河穿夷界十山以會之至叙州而馬湖江會之又十五里  
 而南廣江會之至瀘州而內江又自資簡會之至重慶而嘉陵  
 江自利閬果合等州會之至涪州而黔江合南夷諸水會之至  
 萬縣而開江水自開達等州會之夫然後總而入峽是江自峽  
 而西受大水凡八及出峽而下岳陽則會之者洞庭湖所受湖  
 南北諸水也又自是而下鄂渚則會之者漢口所受興元諸水  
 也又自是而下黃州東四十五里則會之者巴河也又自是而  
 下九江則會之者彭蠡今名鄱陽湖所受江東西諸郡水也又  
 自是而下則會之者皖水所受淮西諸水也夫然後總而入海  
 是以自峽而東又受大水凡五略計天下之水會於江者居天  
 下之半其名稱之大而可考者凡十有三故曰江源其出如甕  
 而能滔滔萬里達海所受者眾也嗚呼問學者可以觀矣

道藏輯要

天下名山記  
四川大江考楊

奎 三 彰集六